

Formando Tatanan Iresponsabel

Nos a keda di shòk! Nos sa ku e ta sosodé, ma riba un eskala tan grandi...? Resientemente presidente di Plataforma di Mayor, Donald Anthony, a trese dilanti ku mas ku 15.000 mucha na Kòrsou ta seriamente perhudiká pa tatanan irresponsabel.

Imaginábo! **15.000**...mas ku 10% di poblashon di Kòrsou! Nos no tin e sifra, ma si nos ta konta tur e muchanan di Kòrsou entre 0-18 aña, e 15.000 lo representá un porsentahe hopi grandi di tur e muchanan di e isla.

Esaki ta okashoná tur klase di problema. E muchanan ta troumatisá, mal alimentá, ta bai skol ku hamber i komo resultado no por siña na skol. Pasobra nan tin difikultat pa siña, nan no ta bai bon na skol, ku e resultado ku nan no por haña bon trabou si nan por logra kaba skol...un futuro skur.

Den hopi kaso, mamanan ta manda nan yunan hòmbler entre 11-15 aña pa kue djòp pa alimentá su mes i su rumannan. I nan ta pone nan e yu muhé entre 13-15 aña prostituí pa haña entrada.

Esei no ta sosodé na Kòrsou so! Kuantu kaso mas ta eksistí asina na nos isla i nos otro islanan ruman?

I unda e tatanan ta? Talbes e ta sinta kombersá i dal su beter trankil di dje huntu ku su amigunan. Su yunan kruelmente ta wanta hamber mientras e ta manda trit pa su amigunan. Kisas e ta drispidí su sèn na weganan di plaka. Por ta ku e ta “gosa” ku un muhé di “bida”.

Kon ta pusíbel ku tata por gosa sin heful mientras mama i yunan ta sufri? Kon ta pusíbel ku e mener ta tan egoísta no tin ku nes ku su yu muhé ta prostituí pa sobreviví?

No tin ku wak muchu leu pa haña kousanan di e problema aki...kousanan ku ketu bai ta enkurashá mas yònkuman pa bai den e mésun mal direkshon.

1) Nos tur sa ku un motibu pa e frakaso di tatanan ta ku nos normanan i balornan a bai pèrdí. Mayornan no ta siña nan yunan loke ta bon i loke ta malu. Den nos komunidat awendia tin hopi hende ku ta “*yama loke ta malu, bon, i loke ta bon, malu, loke ta skuridat, lus, i loke ta lus, skuridat, loke ta marga, dushi, i loke ta dushi, marga*” (Isaias 5:20). Si mayornan no ta traha tempu pa eduká nan yunan, outomatikamente nan lo siña e normanan i balornan kabes abou.

2) Nos tambe por mostra dede riba e mal ehèmpel ku hopi tata ta duna. Hopi tata ke sa ku e yunan ta responsabilidat di e mama; ku e ta responsabel solamente pa duna sèn na kas. Ma Dios ta pone responsabilidat pa e yunan prinsipalmente riba skouder di e **tata**: “*I boso ,tatanan,no proboká boso yunan na rabia, ma lanta nan den e disiplina i instrukshon di Señor*” (Efesionan 6:4). **Responsabilidat di tata ta enserá muchu mas ku duna sèn na kas!** Pa kumpli ku responsabilidat di tata, bo mester invertí tempu pa e yunan. Ma hopi tata **nunka** tin tempu pa e yunan; **nunka** tata t’ei. No por!

3) Ma un motibu prinsipal pa e mentalidat irresponsabel di tatanan, ta nos stèndèrt dòbel pa ku edukashon di nos yunan. Mayornan ta obligá e yunan muhé pa traha na kas, dunando nan responsabilidat den diferente área, ta masha kouteloso ora e ta sali, èts. En kontraste, mayornan ta eduká e yunan hòmbler pa ser irresponsabel. Nan ta enkurash’é pa sali. Si e ta deseá keda kas, nan ta yam’é “muhé”. Asta nan ta enkurash’é pa kore kaya. Komo resultado, e yu hòmbler ta sinta riba kaya ku su amigunan for di un edat hóben, ta dreña sali na kas ki ora e ke. Tin mayor no ta para riba pa e traha na kas, no ta eksigí pa e hasi su bèst na skol. Anto nos no por komprendé kon ta pusíbel ku nos yunan hòmbler ta pone yu riba mundu i no ta despuesto pa kuida nan...

Kada un di nos tin ku evaluá nos mes! Pasobra awe por ta yu di otro hende ku ta irresponsabel. Ma mañan, e tata ku ta hasi kos irresponsabel por ta esun ku bo mes a eduká!